



Վանո Սիրադեղյան

Բուրբ, երգը, երեխան

Երեխան արդեն հասնում էր դպրոցին: Վազքից արդեն անցել էր քելքի:

Վախենում էր գլուխը վեր առնի՝ դպրոցը տեսնի սպասվածից հեռու: Նաև թիփին աչքերին էր խփում, և երեխան գնում էր՝ փալաս կեպին աչքերին քաշած:

Դպրոցին, փաստորեն, հասել էր, մնում էր հասնի շենին: Չորս պատերի ապահովության հեռանկարից արդեն տաքանում էր: Կամ լավ թմբել էր: Այդպես գլուխը կախ գնալու դեմ էր առնելու դռանը և իրեն հաճելի անակնկալ էր մատուցելու:

Երեխան այնքան էր ինքն իրեն ապավինել, այնքան էր մտել ինքն իր մեջ, որ մրմռացող ոտքերը այլևս իրենը չէին: Նա արդեն ոտքերին օգնել չէր կարող և ճիշտը դրանց գոյությունը ուրանալն էր: Եթե ոտքերը իրենը չեն, ուրեմն ցավն էլ իրենը չի, խորամանկում էր երեխան:

Ձեռքից եկածը արել էր. գուլպայի ծակ թաթը ձգել, ոտքի տակ էր դրել, ոտքին մեծ, պոռթած կոշիկների ներսը դարման ու քուրջ էր խցկել, ձեռքն ընկածով կապոտել էր, բայց կարծես բան արած չլիներ: Սառած, անզգալի, պրոտեզի վրա քաշած կոշիկի նման, ուրիշի ոտքին եղածի նման անհաղորդակից կային ու տարօրինակ էլ էր, որ հետը գալիս էին: Այսինքն, առաջն ընկած գնում էին:

Երեխան հասավ դռանը ու դուռը չբացած՝ ներսում էր... Դուռը դեմ ընկավ, ու երեխան ցրտից ոտքից գլուխ դաղվեց: Ուրեմն, դեռ ներսում չէր:

Հարութ քեռի, կանչեց, սատա, Հարութ քեռի:

Երեխային թվաց հեռվի՛ց, դանդաղ, միջանցքով գալիս են: Գալիս չեն հասնում:
Դռան դեմ անակնկալի եկած երեխան անպաշտպան էր: Այդքան չզգալու տված
ցուրտը, այդքան իրենից վանած, արհամարհած ու չարացած ցուրտը մեկեն,
վրիժառու խփել էր երեխային: Կամքը հաշվարկված էր որոշակի տարածության,
որոշակի ժամանակի համար և հիմա իր գործը արել՝ վերացել էր:
Սառնամանիքի դեմ նոր խաղ սկսել չէր լինի, և կամագուրկ մարմինը ցրտի
բերանը տված՝ երեխան տղամարդավարի մղկտում էր: Ու ամեն պահ ներսում
հայտնվելու հույս ուներ:

Դռան փեղկը հույսով ետ գնաց ու դիսկոցով դեմ առավ նիզին:

Էսքան շուտ ո՞ր ես եկել, այ լակոտ:

Հանգը այնպես չէր, թե՛ այ որդի, բա դու մեղք չե՞ս, բա դու քուն ու դադար
չունե՞ս... Ձայնը քնահարամ եղած հարբածի չարություն ուներ, բայց երեխան
չարությունը բիճու փնթփնթոց հասկացավ:

Լավ մարդուն նեղություն տալու համար երեխան մեղավորություն զգաց և արդեն
որպես ներս մտած՝ բացատրեց, արդարացավ.

Հարութ քեռի, ասաց, վազելով եմ եկել՝ շուտ հասա:

Իմ գործը չի, Ավագը կարգադրել է չթողնեն:

Երեխան կարծեց լավ չարդարացավ:

Ավագը չի իմանա, Հարութ քեռի, կմտնեն նատարանի տակ:

Գնա ձեր թախտի տակ մտի, ասաց:

Երեխան կարծեց հոգու հետ խաղ են անում: Կարծեց հետագա վայելքն են
ձգելով քաղցրացնում:

Ավագը իմ մոր քեռու տղեն է, Հարութ քեռի, բաց արա:

Գնա, գնա, ասաց, մի անգամ էլ ետ վագի արի՝ ժամը կգա:

Երեխան առաջին պահ չհավատաց, բայց հեռացող ոտնաձայնը իրոք հեռանում էր: Երեխայի խելքը մտավ, որ, ուրեմն, ճիշտը տուն գնալ դառնալն է: Եթե դուրը չեն բացում, ուրեմն ճիշտը դա է, ու իր լավն են ուզում: Բայց բուքը, մութը, բքից սսկված, տեղները չմատնող շները... Երեխան դպրոցի մատույցներում ձեռքի փայտը վախի հետ շարտել էր՝ ո՞նց գտներ: Հետո, ախր, ո՞նց կարող էր տուն գնալ դառնալը ավելի հարմար լինել: Իսկ եթե հարմար չէ, դուռն ինչո՞ւ չբացեցին... Երեխայի միտքն էլ էր սառչում: Իսկ ոտքերը ինքնաբերաբար դոփդոփում էին: Երեխան արդեն պարում էր: Բայց ուր գցած շորի պայուսակը լնգլնգում էր և գրպանիկի թանաքամանը կարող էր շուռ գալ: Երեխան ձախ ձեռքը հանեց թևատակից, շորի վրայից բռնեց թանաքամանը, բութ, սառչող մատով խցեց բերանը: Հիմա կարող էր ապահով թռչկոտել:

Ձախ ձեռքն էլ ոտքերի հետ սառչում էր: Ականջներին երեխան կամքի գերագույն լարումով ձեռք չէր տալիս. տրորեր՝ մղկտոցը սաստկանալու էր: Միտքը ցրտից, ցավից շեղել էր պետք: Մի բան անել պետք էր: Հիշեց, որ գրպանում հացի կտոր կա, աչ ձեռքն էլ թևատակից հանեց, կոխեց գրպանը՝ լիքը ձյուն էր, ձյան տակ հացը քարացել էր: Եվ երեխան սկսեց երգել.

Այսքան ուրախ կյանքը մեր ընկեր էսինչն է տվել,

Այսքան ուրախ կյանքը մեր ընկեր էսինչն է տվել...

Սովից ցնդել ե՞ս, այ լակոտ:

Երեխան քարացավ: Ամոթից մի երկվայրկյան նույնիսկ տաքացավ: Իր երգելը երգեցողության դասատուն անգամ լսած չկար, իսկ սա Ավագն էր: Երեխան կուշ եկավ ու սպասում էր, որ վզակոթին տան: Միաժամանակ սպասում էր դուրը բացվելուն: Լարումից երեխան մի քիչ էլ տաքացավ: